

COMIENZO DI DRUMBAND CU E RITMO YAMA AWE "ASAMBEHO"

(Saca for di documentacion di carnaval di Juby Naar)

Ultimo dos dianan por a tende comentarionan na radio riba e ritmo Asambeho, y con el a cuminza, unda el a cuminza etc. y mi por a ripara cu hopi ta papia pero no tin e historia exacto tampoco. For di e documentacionnan cu mi tin riba esaki, mi por publica un parti awe relaciona cu e comienzo y agrega algo mas di e drumbandnan.

Na Aruba ta ser papia di brassband, pero locual nos ta hayando den parada no ta brassband, sino drum band.

Brassband manera e tabata conoci den añanan 50 (mi ta pensa aki riba **Excelsior Brassband** por ehemplo) ta e agrupacion pero cu e brass dilanti, sigui pa e drumnan.

Drumbandnan tin e drum nan dilanti y cu e brass parti patras.

Ta ser bisa cu drumband a cuminza na YMCA di un grupo di mucha cu a bini cu un ritmo nobo etc. pa sigui e historia cu ta ser ripiti.

Esaki no ta verdad tampoco.

Si mi tin cu bay back, mi por bisa cu ta den año 1964 caba, **Sam Hodge**, tabata tin un banda chiquito ta entrena den **NWIWA club**, conoci como **St. Maarten Club** na San Nicolas.

Cu mi por corda, **Bulto Gibbs** tabata un di su saxophonistanan cu a cuminza cune, tambe e trompetista di faam **Lovell**, e trompetista como mucha ainda, **Boy Boy Richards** cu tabata tin un braza.

Como joven nos tabata sali di entrenamiento di tennis, baseball, of atletismo di Lago Sport park pa bay sinta scucha e drumband.

E drumnan tabata locual e muchanan tabata tin e tempo ey y nada di gaba pa medio di sponsor of donacion etc.

Theo Latig tabata riba e drum baho, **Walter Spearr** tabata e maestro di drum hunto cu **Oily**.

Tabata tin algun mas cu mi no ta corda nan number actualmente.

Den año 1966, e año prome cu nan a drenta parada di carnaval, nan a muda pa YMCA.

Pakico?

Pasobra Lago Community School a cera y Lago a haci donacion na YMCA di un set completo di drum y aki lesnan a ser duna den otro esfera y ambiente.

Aki ta unda **Arnold Beyde** a bin cay aden como trompetista yudando e muchanan y e grupo hunto cu **Sam** y **Bulto** cu tabata e grandinan dirigiendo e jovennan.

Tabata tin hende cu a yama e drumband aki e Esso drumband pero esaki tabata pa motibo cu riba e drumnan tabata tin emblema di Esso

como cu nan a ser regala di parti di e compania di Esso. Ta kita no a kita e emblema.

Na YMCA tambe tabata unda e placer di scucha libremente a bay perdi, pasobra pastoor di San Nicolas no tabata kier pa catoliconan drenta YMCA tampoco.

YMCA tabata wordo mira e tempo ey ainda como un lugar pa protestantnan y caminda catolico no mag mescla. Toch hopi joven catolico tabata bay scucha e drumband cu su ritmo cadente "afro" mescla cu e ritmo di "marching band".

Na 1967 como president di **Goldfinger Fanclub na Bonaire Club**, despues cu nos a caba di traha e carosa cu su dede di oro, tabata tin mester di un grupo musical pa toca den parada, y aki ta unda mi a aserca e drumband cu a ser paga 50 florin pa parada y a bin resulta "e prome BRASSBAND" den parada di carnaval.

Cerca e gruponan di awe, no ta haya e "roll drum" mas caminda e tocador ta keda lora usando su bols den mes sistema cu un tocador di "first pan" y tambe di "second pan" di steelband ta "roll" riba notanan.

Di e bassdrum ta perdi tambe e "double beat" cu den **D2U 365** so ta haya de vez en cuando ainda.

Locual a bay perdi den drumband ta e "steel". E riem di wiel di auto.

Esaki tambe a kita parti di e originalidad.

Awe nos ta mira nan ta toca wiri na su lugar, locual no ta e cos.

E harmonia di e musica tambe a bay perdi.

E drumband di **Beyde y Hodge** tabata tin cada tromp tocando otro tono. Awe bo ta haya 10 trompet y tur tocando e mes cos na mes tono. Den Macarena ta haya e drumnan tocando casi e mes tono di e trompetnan sin e variacion.

E "metronomo" (dunando tanto sla pa bara, mas o menos 80 pa 100 pulso) por ser compara cu esun di steelband y esaki ta e ritmo riba cual e hendenan ta marcha of baila riba e roadmarch.

E ritmo ta segun e metronomo basa riba marching band y steelband.

Mirando grandura di algun drumband awe, mi lo por bisa compara cu e prome nan, di YMCA y di **Rufo Odor All Stars**, cu por cohe e brassbandnan grandi di awe parti nan na dos, y nan ta duna e mes sonido cu un brassband di 30 año pasa y no ta baha nada pa e sonido di 30 pa 40 tocador di awe.

E brassbandnan di principio tabata saca e sonido segun harmonia di instrumentonan y awe segun cantidad di instrumento.

Pa e Zomer carnaval na Hulanda lo ta bunita pa mira e grupo aki na Hulanda riba cayanan hulandes, sorprendiendo hulandesnan mes, Arubianonan, y Antilanan, tambe tur hende di otro nacionalidadnan cu no conoce kico ta steelband (pa carnaval).

BANDANAN MUSICAL

Riba bandanan musical mi no ta bay mucho y ta laga esey den man di ASOMA. Locual si mester trece dilanti ta cu di un manera of otro tarifanan pa bandanan den parada mester baha **DRASTICAMENTE** pa nos por mantene nos carnaval.

Imaginabo cu un grupo a paga dos banda (pa no menciona cifra exacto) entre 50 y 75 mil florin. E resto ta keda na ASOMA y bandanan.

MATERIAL COSTOSO

Atrobe por a tende di mate-

rialnan cu mester pa carnaval y nan prijsnan halto. Atrobe por tende di e 22 % cu mester wordo paga como arancel riba e productonan aki.

Pa bisa verdad, mi no a tende reclamo riba e pacusnan e año aki, ni riba establecimentonan cu normal ta vende tur lo necesario. Locual si a ser comenta ta e caro cu tur cos ta.

Aki tin un tarea pa Comision Vision 2000 y cu lo por recomendar gobierno "did of dat".

WORKSHOP PA NOS JUVENTUD

Algun dia pasa mi tabata conversando cu John Fleming riba e necesidad di workshop pa juventud. Mi ta na altura cu durante e convencion di FECC na Aruba di dia 24 pa dia 30 di april, lo tin workshop riba disfraz y gruponan di carnaval.

Ta di spera cu esaki lo ser habri pa nos hendenan local tambe por acudi hunto cu e 200 pa 300 dignatario di carnaval di rond mundo cu lo ta

na Aruba.

Di otro banda lo mi bisa cu hunto cu John, y si tin mas interesado pa tuma contacto cu nos, nos lo por hinca un of mas workshop den otro pa stimula esnan cu kier cuminza cu grupo di carnaval y duna idea riba disfraznan etc.

Semper mi a bisa cu barionan den tur distrito por sali cu un grupo di carnaval di mas o menos 50 hende y yuda haci e carnaval mas grandi cu mas grupo.

Pa carnaval di mucha esaki ta conta tambe.

DUNA MI BO PROPOSICION

Aki mi kier haci un apelacion na tur esnan cu kier mira cambio den carnaval, pa nan mandami skirbi, nan ideanan pa mejoracion di carnaval. Mi mester esaki prome cu fin di e luna aki, mas tarda dia 28 di februari.

Mandami ki idea bo tin pa actividadnan nobo, kico bo kier mira cambia den actividadnan actual, kico bo ta kere cu pueblo kier den car-

naval.

Kico lo mi haci cu nan exactamente mi no sa ainda dependiendo kico nan ta.

Sigur si ta cu mi lo trece nan dilanti den Comision Vision 2000.

Ademas, lo mi por dedica espacio den e simannan cu ta sigui riba tur e proposicionnan, ideanan etc.

Ta yega tempo pa esnan cu ta involvi cu carnaval haya sa tambe kico e pueblo carnavalesista ta desea, pues haci esey.

Mandami na **DIARIO** bo envelop cu bo ideanan, proposicionnan y nos lo mira con leeuw nan lo por yega. Awe nos ta keha... Si no tin e proposicionnan... Si nos hendenan no habri boca... laga nos no keha mañan. Nos tur mester trata na aporta cu algo.

TRASPASO DI MANDO

Un actividad cu lo mi kier mira como algo mas bunita ta e traspaso di mando.

E sistema anticua dilanti oficina di gobierno cu prome ministro ricibiendo e procla-

macion y entregamento di yabi, mester di un toque nobo.

Esaki ta algo cu mester haci un actividad special publico di dje, y no na e manera cu e ta actualmente.

MUCHANAN DEN NOS CARNAVAL

Nos tin actividadnan cu mucha, manera e eleccion di reina infantil, tumberito y calipso, tambe paradanan di mucha.

E eleccion mester cuminza mas tempran of na ora stipula y termina tempran. Tumberito y Calipso mi no ta menciona mucho di nan, y ta laga esey pa esnan cu ta encarga cune.

Pero si, mester bini stipulacionnan special pa participantenan.

Cuminza na ora y termina tempran tambe.

Mayornan mester keda for di e concursonan aki.

Si bo a inscribi bo yiu y e ta cumpli cu tur requisito necesario, laga e resto den man

Sigui lesa pag. 30